

赫風班氏禮書

卷二蘭臺集

班氏遺書蘭臺集序

班蘭臺固著漢書一百十五卷外有白虎通六卷在昔一篇太甲一篇續桓譚琴道一篇續揚訓纂十二章

見藝文

志又有漢武故事漢武內傳舊題班固撰然史不云固有此作晁公武據張東之洞冥記跋謂故事出于王儉當必有見內傳一書隋志雖著錄然亦不著撰人未可定爲固作也清四庫全書總目子部論之甚詳固文集隋志載十七卷新唐書志作十卷宋志卽不著錄蓋已佚矣明張溥集佚文二十八篇爲蘭臺集今以覽海遊居二賦入叔皮

集增入離騷三序又校補目錄賦祝文佚詩七條凡得文
三十一篇固既雋才又嗣家學文章妙麗得結主知讀書
禁中徧窺秘籍今觀兩都賦和親議泗水亭長碑銘諸作
皆練習國故有益前聞至薦謝夷吾表奏記東平王書吹
噓循良汲引時賢可謂虛懷延攬善如不及矧競之獄旋
卽抵罪朝論公明覆盆冤雪固不得與伯喈蔚宗蒙身後
之名者同論已壬戌四月張鵬一

張溥題詞

安陵班叔皮清淨守道有二令子孟堅文章領著作仲升
武節威西域天下之奇在其一門漢世無比仲升功名拔
傅介子張騫以上孟堅晚節竟蹶不起亡時與蔡中郎同
年又以竇氏賓客爲洛陽种令所捕繫頓辱更甚私心痛
其才同厥考而志耻薄宦冒進失當不若望都長優游以
終也叔皮專心史籍欲撰漢史孟堅踵就其業爲人誣訟
陷身獄網仲升馳闕分明轉禍爲福危哉漢書之得成更
兩世閱變故如是其不易也兩都做上林賓戲擬客難典

引居封禪美新之間大體取象前型制以心極而師覆徒
奔反在燕然片石夫惟大雅既明且哲豈孟堅亦讀而未
之詳乎婁東張溥題

後書本傳

班固字孟堅年九歲能屬文誦詩書及長遂博貫載籍九流百家之言無不窮究所學無常師不爲章句舉大義而已性寬和容衆不以才能高人諸儒以此慕之永平初東平王蒼以至戚爲驃騎將軍輔政開東閣延英雄時固始弱冠奏記說蒼蒼納之父彪卒歸鄉里固以彪所續前史未詳乃潛精研思欲就其業既而有人上書顯宗告固私改作國史者有詔下郡收固繫京兆獄盡取其家書先是扶風人蘇朗僞言圖讖事下獄死固弟超恐固爲郡所覈

考不能自明乃馳詣闕上書得召見具言固所述著意而郡亦上其書顯宗甚奇之召詣校書部除蘭臺令史與前睢陽令陳宗長陵令尹敏司隸從事孟異共成世祖本紀遷爲郎典校秘書固又撰功臣平林新市公孫述事作列傳載記二十八篇奏之帝乃復使終成前所著書固以爲漢紹堯運以建帝業至於六世史臣乃追述功德私作本紀編於百王之末則於秦項之列太初以後闕而不錄故探撰前記綴集所聞以爲漢書起元高祖終于孝平王莽之誅十有二世二百三十年總其行事傍貫五經上下洽

通爲春秋考紀表志傳凡百篇固自永平中始受詔潛精積思二十餘年至建初中乃成當世甚重其書學者莫不

諷誦

書
嶠
漢書作莊誦

焉自爲郎後遂見親近時京師脩

起宮室濬繕城隍而關中耆老猶望朝廷西顧固感前世

相如壽王東方之徒造構文辭終以諷勸乃上兩都賦盛

稱洛邑制度之美以折西賓淫佚之論及肅宗雅好文章

固愈得幸數入讀書禁中或連日繼夜每行巡狩輒獻上

賦頌朝廷有大議使難問公卿辨論於前賞賜恩寵甚渥

固自以二世才術位不過郎

書
嶠
漢書作郎中

感東方朔

揚雄自論以不遭蘇張范蔡之時作賓戲以自通焉後遷
立武司馬天子會諸儒講論五經作白虎通德論令固撰
集其事時北單于遣使貢獻求欲和親詔問羣僚議者或
以爲匈奴變詐之國無內向之心徒以畏漢威靈逼憚南
虜故希望報命以安其離叛今若遣使恐失南虜親附之
歡而成北狄猜詐之計不可固議因今施惠爲策近長固
又作典引篇叙述漢德以爲相如封禪靡而不典揚雄美
新典而不實蓋自謂得其致焉固後以母喪去官永元初
大將軍竇憲出征匈奴以固爲中護軍與參議北單于聞

漢軍出遣使歛居延塞欲修呼韓邪故事朝見天子請大
使憲上遣固行中郎將事將數百騎與虜使俱出居延塞
迎之會南匈奴掩破北庭固至私渠海聞虜中亂引還及
竇憲敗固先坐免官固不教學諸子諸子多不遵法度吏
人苦之初洛陽令种兢嘗行固奴干其車騎吏推呼之奴
醉罵競大怒畏憲不敢發心銜之及竇氏賓客皆逮考兢
因此捕繫固遂死獄中時年六十一詔以譴責兢抵主者
吏罪固所著典引賓戲應譏詩賦銘誅頌書文記論議六
言在者凡四十一篇

漢書自敘曰固弱冠而孤作幽通之賦以致命遂志永平
中爲郎典校秘書尋篤志於博學以著述爲業或譏以無
功又感東方朔揚雄自諡以不遭蘇張范蔡之時曾不折
之以正道明君子之所守故聊復應焉後文見固以爲唐虞
三代詩書所及世有典籍故雖堯舜之盛必有典謨之篇
然後世冠德於百王故曰巍巍乎其有成功也煥乎其有
文章也漢紹堯運以建帝業至於六世史臣乃追述功德
私作本紀編於百王之末廁於秦項之列太初以後闕而
不錄故探纂前記綴輯所聞以述漢書起于高祖終于孝

平王莽之誅十有二世二百三十年綜其行事旁貫五經
上下洽通爲春秋考紀表志傳凡百篇

張懷瓘書斷曰班固字孟堅扶風安陵人官至中郎將工
篆李斯曹喜之法悉能究之昔李斯作蒼頡篇趙高作爰
歷篇胡毋敬作博學篇漢興閭里書私合之想謂蒼頡篇
斷六千字爲一章凡十五章至平帝元始中徵天下通小
學者以百數各記字於未央庭中揚雄取其有用者作訓
纂篇二十四章以纂續蒼頡也孟堅乃復續十三章和帝
永元中賈魴又撰異字取固所續章而廣之爲三十四章

用訓纂之末字以爲篇目故曰滂喜篇言滂沱大盛也凡百二十三章文字備矣明帝命孟堅成父彪所述漢書永平初受詔至章帝建初二十五年而成

鍾嶸詩品曰孟堅才流而老於掌故觀其詠史有感歎之

詞

詠史詩一首見文選一

文心雕龍史傳曰班固述漢因循前業觀司馬遷之辭思實過半其十志茲富讚序弘麗儒雅彬彬信有遺味至於宗經矩聖之典端緒豐贍之功遣親攘美之罪徵賄鬻筆之愆公理辨之究矣

扶風班氏遺書蘭臺集目

關隴叢書

賦四

兩都賦

有序

幽通賦

終南山賦

竹扇賦

表一

為第五倫薦謝夷吾表

奏記牋書三

奏記東平王蒼

與竇憲牋

六則

與弟超書

九則

符命一

典引 有序

頌三

東巡頌

南巡頌

寶車騎北征頌

銘三

封燕然山銘

有序

高祖泗水亭碑銘

十八侯銘

議一

匈奴和親議

序二

離騷序

離騷贊序

連珠五

連珠

歌詩三

郊祀靈芝歌

雜文三

奕旨

遺文十一則

詠史

竹扇詩

答賓戲

難嚴周

二則

扶風班氏佚書卷二蘭臺集

據漢魏百三家集接補

關隴叢書

後漢扶風班固孟堅撰

富平張鵬一校補

賦

兩都賦

有序

或曰賦者古詩之流也昔成康沒而頌聲寢王澤竭而詩不作大漢初定日不暇給至於武宣之世乃崇禮官考文章內設金馬石渠之署外興樂府協律之事以興廢繼絕潤色鴻業是以衆庶說豫福應尤盛白麟赤鴈芝房寶鼎之歌薦於郊廟神雀五鳳甘露黃龍之瑞以爲年紀故言

語侍從之臣若司馬相如虞邱壽王東方朔枚臯王褒劉
向之屬朝夕論思日月獻納而公卿大臣御史大夫倪寬
大常孔臧太中大夫董仲舒宗正劉德太子太傅蕭望之
等時時間作或以抒下情而通諷諭或以宣上德而盡忠
孝雍容揄揚著於後嗣抑亦雅頌之亞也故孝成之世論
而錄之蓋奏御者千有餘篇而後大漢之文章炳焉與三
代同風且夫道有夷隆學有粗密因時而建德者不以遠
近易則故臯陶歌虞奚斯頌魯同見采於孔氏列於詩書
其義一也稽之上古則如彼考之漢室又如此斯事雖細

然先臣之舊式國家之遺美不可闕也臣竊見海內清平
朝廷無事京師修宮室浚城隍起苑囿以備制度西土耆
老感懷怨思冀上之眷顧而盛稱長安舊制有陋洛邑之
議故臣作兩都賦以極衆人之所眩曜折以今之法度其
辭曰

西都賦

有西都賓問於東都主人曰蓋聞皇漢之初經營也嘗有
意乎都河洛矣輟而弗康寔用西遷作我上都主人聞其
故而覩其制乎主人曰未也願賓據懷舊之蓄念發思古

之幽情博我以皇道弘我以漢京賓曰唯唯漢之西都在
於雍州實曰長安左隩函谷二嶠之阻表以太華終南之
山右界褒斜隴首之險帶以洪河涇渭之川衆流之隈沂
湧其西華實之毛則九州之上腴焉防禦之阻則天地之
隩區焉是故橫被六合三成帝畿周以龍興秦以虎視及
至大漢受命而都之也仰悟東井之精俯協河圖之靈奉
春建策留侯演成天人合應以發皇明乃眷西顧實惟作
京於是晞秦嶺哦北阜挾澧灞據龍首圖皇基於億載度
宏規而大起肇自高而終平世增飾以崇麗歷十二之延

祚故窮奢而極侈建金城而萬雉呀周池而成淵披三條
之廣路立十二之通門內則街衢洞達閭閻且千九市開
場貨別隧分人不得顧車不得旋闐城溢郭旁流百塵紅
塵四合煙雲相連於是既庶且富娛樂無疆都人士女殊
異乎五方遊士擬於公侯列肆侈於姬姜鄉曲豪舉遊俠
之雄節慕原嘗名亞春陵連交合衆騁鶩乎其中若乃觀
其四郊浮遊近縣則南望杜霸北眺五陵名都對郭邑居
相承英俊之域紱冕所興冠蓋如雲七相五公與乎州郡
之豪傑五都之貨殖三選七遷克奉陵邑蓋以強幹弱枝

隆上都而觀萬國也封畿之內厥土千里遠躒諸夏兼其
所有其陽則崇山隱天幽林窮谷陸海珍藏藍田美玉商
陸緣其隈鄠杜濱其足源泉灌注陂池交屬竹林果園芳
草甘木郊野之富號爲近蜀其陰則冠以九嶷陪以甘泉
乃有靈宮起乎其中秦漢之所極觀淵雲之所頌歎於是
乎存焉下有鄭白之沃衣食之源提封五萬疆場綺紛溝
塍刻鏤原隰龍鱗決渠降雨荷鍤成雲五穀垂穎桑麻鋪
菜東郊則有通溝大漕潰渭洞河泛舟山東控引淮湖與
海通波西郊則有上囿禁苑林麓藪澤陂池連乎蜀漢繚

以周墻四百餘里離宮別館三十六所神池靈沼往往而
在其中乃有九州之麟大宛之馬黃支之犀條枝之鳥踰
岷崙越巨海殊方異類至于三萬里其宮室也體象乎天
地經緯乎陰陽據坤靈之正位倣太紫之圓方樹中天之
華闕豐冠山之朱堂因瓌材而究奇抗應龍之虹梁列棼
橈以布翼荷棟桴而高驪雕玉瑱以居楹裁金璧以飾璫
發五色之渥彩光爛朗以景彰於是左城右平重軒三階
闈房周通門闔洞開列鍾虞於中庭立金人於端闈仍增
崖而衡闔臨峻路而啟扉狗以離宮別寢承以崇臺閭館

煥若列宿紫宮是環清涼宣溫神仙長年金華玉堂白虎
麒麟區宇若茲不可殫論增盤崔嵬登降炤爛殊形詭制
每各異觀乘茵步輦惟所息宴後宮則有掖庭椒房后妃
之室合歡增城安處常寧茝若椒風披香發越蘭林蕙草
鴛鴦飛翔之列昭陽特盛隆乎孝成屋不呈材墻不露形
裊以藻繡絡以綸連隋侯明月錯落其間金釭銜璧是爲
列錢翡翠火齊流耀含英懸黎垂棘夜光在焉於是立墀
鉅砌玉階彤庭硬碱綵緻琳珉青熒珊瑚碧樹周阿而生
紅羅颯繡綺組繽紛精曜華燭俯仰如神後宮之號十有

四位窈窕繁華更盛迭貴處乎斯列者蓋以百數左右庭
中朝堂百寮之位蕭曹魏邴謀謨乎其上佐命則垂統輔
翼則成化流大漢之愷悌蕩亡秦之毒螫故令斯人揚樂
和之聲作畫一之歌功德著乎祖宗膏澤洽乎黎庶又有
天祿石渠典籍之府命夫惇誨故老名儒師傅講論乎六
藝稽合乎同異又有承明金馬著作之庭大雅宏達於茲
爲羣元元本本殫見洽聞啟發篇章校理秘文周以鉤陳
之位衛以嚴更之著總禮官之甲科羣百郡之廉孝虎賁
贅衣闔尹闔寺陞戟百重各有典司周廬千列微道綺錯

輦路經營修涂飛閣自未央而連桂宮北彌明光而亘長
樂凌塏道而超西墉掘建章而連外屬設璧門之鳳闕上
觚稜而棲金爵內則別風之嵯嶢眇麗巧而聳擢張千門
而立萬戶順陰陽以開闔爾乃正殿崔巍層構厥高臨乎
未央經駘盪而出馭娑洞粉詣以與天梁上反宇以蓋戴
激日景而納光神明鬱其特起遂偃蹇而上躋軼雲雨於
太半虹霓迴帶於芬楣雖輕迅與僿狡猶愕眙而不能階
攀井幹而未半日昫轉而意迷捨櫺檻而却倚若顛墜而
復稽魂怳怳以失度巡迴途而下低既懲懼於登望降周

流以彷徨步甬道以縈紆又杳窳而不見陽排飛闥而上
出若遊目於天表似無依而洋洋前唐中而後太液覽滄
海之湯湯揚波濤於碣石激神岳之嵒嵒濫瀛洲與方壺
蓬萊起乎中央於是靈草冬榮神木叢生巖峻嶮翠金石
崢嶸抗仙掌以承露擢雙立之金莖軼埃壘之混濁鮮顯
氣之清英騁文成之不誕馳五利之所刑庶松喬之羣類
時遊從乎斯庭實列仙之攸館非吾人之所寧爾乃盛娛
遊之壯觀奮大武乎上囿因茲以威戎夸狄耀威靈而講
武事命荊州使起烏詔梁野而驅獸毛羣內闐飛羽上覆

接翼側足集禁林而屯聚水衡虞人修其營表種別羣分
部曲有署采網連絃籠山絡野列卒周匝星羅雲布於是
乘鑿輿備法駕帥羣臣披飛廉入苑門遂繞鄩鄙歷上蘭
六師發逐百獸駭殫震震爚爚雷奔電激草木塗地山淵
反覆蹂躪其十二三乃拗怒而少息爾乃期門飲飛列刃
攢鏃要訣追蹤鳥驚觸絲獸駭值鋒機不虛倚竝不再控
矢無單殺中必疊雙颺颺紛紛縉繳相纏風毛雨血灑野
蔽天平原赤勇士厲猿狖失木豺狼懾竄爾乃移師趨險
竝蹈潛穢窮虎奔突狂兕觸蹶許少施巧秦成力折倚僂

狡扼猛噬脫角挫脰徒搏獨殺挾師豹拖熊螭曳犀犛頓
象羆超洞壑越峻崖蹶斬巖巨石頽松柏仆叢林摧草木
無餘禽獸殄夷於是天子乃登屬玉之館歷長楊之榭覽
山川之體勢觀三軍之殺獲原野蕭條日極四裔禽相鎮
壓獸相枕藉然後收禽會衆論功賜胙陳輕騎以行魚騰
酒車以斟酌割鮮野食舉烽命醕饗賜畢勞逸齊大輅鳴
鑾容與徘徊集乎豫章之宇臨乎昆明之池左牽牛而右
織女似雲漢之無涯茂樹蔭蔚芳草被隄蘭苳發色曄曄
猗猗若摛錦布繡燭耀乎其陂鳥則玄鶴白鷺黃鵠鸚鵡

鷓鴣鵙鷓鳧鷺鴻雁朝發河海夕宿江漢沈浮往來雲集
霧散於是後宮乘輶輅登龍舟張鳳蓋建華旗祛黼帷鏡
清流靡微風澹淡浮櫂女謳鼓吹震聲激越警厲天鳥羣
翔魚窺淵招白鷗下雙鵠揄文竿出比目撫鴻暈御增繳
方舟竝鶯俛仰極樂遂乃風舉雲搖浮遊溥覽前乘秦嶺
後越九嶷東薄河華西涉岐雍宮館所歷百有餘區行所
朝夕儲不改供禮上下而接山川究休祐之所用采遊童
之歡謠第從臣之嘉頌於斯之時都都相望邑邑相屬國
藉十世之基家承百年之業士食舊德之名氏農服先疇

之畎畝商修族世之所嚮工用高曾之規矩彙乎隱隱各
得其所若臣者徒觀迹於舊墟聞之乎故老十分而未得
其一端故不能徧舉也

東都賦

東都主人喟然而歎曰痛乎風俗之移人也子實秦人矜
夸館室保界河山信誠昭襄而知始皇矣烏覩大漢之云
爲乎夫大漢之開原也奮布衣以登皇位由數期而創萬
代蓋六籍所不能談前聖靡得言焉當此之時功有橫而
當天討有逆而順民故婁敬度勢而獻其說蕭公權宜而

拓其制時豈泰而安之哉計不得以已也吾子曾不是睹
顧曜後嗣之末造不亦暗乎今將語子以建武之理永平
之事監于太清以變子之惑志往者王莽作逆漢祚中缺
天人致誅六合相滅于時之亂生民幾亡鬼神泯絕壑無
完樞郭罔遺室原野厭人之肉川谷流人之血秦項之災
猶不克半書契以來未之或紀故下人號而上訴上帝懷
而降監乃致命乎聖皇於是聖皇乃握乾符闡坤珍披皇
圖稽帝文赫然發憤應若興雲霆擊昆陽憑怒雷震遂超
大河跨北嶽立號高邑建都河洛紹百王之荒屯因造化

之盪滌體元立制繼天而作系唐統接漢緒茂育羣生恢
復疆宇勳兼乎在昔事勤乎三五豈特方軌竝跡紛綸后
辟理近古之所務蹈一聖之險易云爾哉且夫建武之元
天地革命四海之內更造夫婦肇有父子君臣初建人倫
實始斯乃伏羲氏之所以基皇德也分州土立市朝作舟
輿造器械斯乃軒轅氏之所以開帝功也龔行天罰應天
順人斯乃湯武之所以昭王業也遷都改邑有殷宗中興
之則焉卽土之中有周成隆平之制焉不階尺土一人之
柄同符乎高祖克己復禮以奉終始允恭乎孝文憲章稽

古封岱勒成儀炳乎世宗按六經而校德眇古昔而論功
仁聖之事既該而帝王之道備矣至於永平之際重熙而
累洽盛三雍之上儀脩袞龍之法服敷鴻藻信景鑠揚世
廟正雅樂人神之和允洽羣臣之序既肅乃動大輅遵皇
衢省方巡狩躬覽萬國之有無考聲教之所被散皇明以
燭幽然後增周舊修洛邑扇巍巍顯翼翼光漢京于諸夏
總八方而爲之極是以皇城之內宮室光明闕庭神麗奢
不可踰儉不能侈外則因原野以作死墳流泉而爲沼發
蘋藻以潛魚豐圃草以毓獸制同乎梁騶詎合乎靈囿若

乃順時節而蒐狩簡車徒以講武則必臨之以王制考之
以風雅歷騶虞覽駟騏嘉車攻采吉日禮官正義乘輿乃
出於是發鯨魚鏗華鐘登玉輅乘時龍鳳蓋颯灑和鑾玲
瓏天官景從寢威盛容山靈護野屬御方神雨師泛灑風
伯清塵千乘雷起萬騎紛紜元戎竟野戈鋌彗雲羽旄掃
霓旌旗拂天焮焮炎炎揚光飛文吐爛生風欲野歆山日
月爲之奪明邱陵爲之搖震遂集乎中囿陳師案屯駢部
曲列校隊勒三軍誓將帥然後舉烽伐鼓申令三驅轡車
霆激驍騎電驚由基發射范氏施御茲不隄禽轡不詭遇

飛者未及翔走者未及去指顧倏忽獲車已實樂不極盤
殺不盡物馬踠餘足士怒未溱先驅復路屬車按節於是
薦三犧效五牲禮神祇懷百靈覲明堂臨辟雍揚緝熙宣
皇風登靈臺考休徵俯仰乎乾坤參象乎聖躬目中夏而
布德瞰四裔而抗稜西盪河源東澹海北動幽崖南耀
朱垠殊方別區界絕而不鄰自孝武之所不征孝宣之所
未臣莫不陸讐水慄奔走而來賓遂綏哀牢開永昌春王
三朝會同漢京是日也天子受四海之圖籍膺萬國之貢
珍內撫諸夏外綏百蠻爾乃盛禮興樂供帳置乎雲龍之

庭陳百寮而贊羣后究呈儀而展帝容於是庭實千品旨
酒萬鍾列金鼎班玉觴嘉珍御太牢饗爾乃食舉雍徹太
師奏樂陳金石布絲竹鐘鼓鏗鎗管絃擘煜抗五聲極六
律歌九功舞八佾詔武備太古畢四夷間奏德廣所及僭
侏兜離罔不具集萬樂備百禮暨皇歡浹羣臣醉降烟熅
調元氣然後撞鐘告罷百寮遂退於是聖上觀萬方之歡
娛又沐浴於膏澤懼其侈心之將萌而怠於東作也乃申
舊章下明詔命有司班憲度昭節儉示太素去後宮之麗
飾損乘輿之服御除工商之淫業興農桑之盛務遂令海

內棄末而反本背僞而歸真女修織紉男務耕耘器用陶
匏服尚素立恥纖靡而不服賤奇麗而不珍捐金於山沈
珠於淵於是百姓滌瑕盪穢而鏡至清形神寂寞耳目不
營嗜慾之源滅廉正之心生莫不優游而自得玉潤而金
聲是以四海之內學校如林庠序盈門獻酬交錯俎豆莘
莘下舞上歌蹈德詠仁登降飫宴之禮既畢因相與嗟歎
立德讜言弘說咸含和而吐氣頌曰盛哉乎斯世今論者
但誦虞夏之書詠殷周之詩講義文之易論孔氏之春秋
罕能精古今清濁究漢德之所由唯子頗識舊典又徒馳

騁乎末流溫故知新已難而知德者鮮矣且夫僻界西戎
險阻四塞脩其防禦孰與處乎土中平夷洞達萬方輻湊
秦嶺九山涇渭之川曷若四瀆五嶽帶河泝洛圖書之淵
建章甘泉館御列仙孰與靈臺明堂統和天人太液昆明
鳥獸之囿曷若辟雍海流道德之富游俠踰侈犯義侵禮
孰與同履法度翼翼濟濟也子徒習秦阿房之造天而不
知京洛之有制也識函谷之可關而不知王者之無外也
主人之辭未終西都賓矍然失容逡巡降階悚然意下捧
手欲辭主人曰復位今將授子以五篇之詩賓既卒業乃

稱曰美哉乎斯詩義正乎楊雄事實乎相如匪唯主人之
好學蓋乃遭遇乎斯時也小子狂簡不知所裁既聞正道
請終身而誦之其詩曰

明堂詩

於昭明堂明堂孔陽聖皇宗祀穆穆焯焯上帝 饗五位
時序誰其配之世祖光武普天率土各以其職猗歟緝熙
允懷多福

辟雍詩

乃流辟雍辟雍湯湯聖皇蒞止造舟爲梁皤皤國老乃父

乃兄抑抑威儀孝友光明於赫太上示我漢行洪化惟神
永觀厥成

靈臺詩

乃經靈臺靈臺既崇帝勤時登爰考休徵三光宣精五行
布序習習祥風祁祁甘雨百穀蓊蓊庶草蕃廡屢惟豐年
於皇樂胥

寶鼎詩

嶽修貢兮川效珍吐金景兮歆浮雲寶鼎見兮色紛紛緼
煥其炳兮被龍文登祖廟兮享聖神昭靈德兮彌億年

白雉詩

啟靈篇兮披瑞圖
獲白雉兮效素烏
嘉祥阜兮集皇都
發皓羽兮奮翹英
容藻朗兮於純精
彰皇德兮侔周成
永延長兮膺天慶

幽通賦

系高項之玄胄兮
氏中葉之炳靈
颯颯風而蟬蛻兮
雄朔野以颺聲
皇十紀而鴻漸兮
有羽儀於上京
巨滔天而泯夏兮
考邁愍以行謠
終保己而貽則兮
里上仁之所廬
懿先烈之純淑兮
窮與達其必濟
咨孤蒙之眇眇兮
將圯絕

而罔階豈余身之足殉兮違世業之可懷靖憊處以永思
兮經日月而彌遠匪黨人之敢拾兮庶斯言之不玷魂煢
煢與神交兮精誠發於宵寐夢登山而迴眇兮覲幽人之
髣髴攬葛藟而授余兮眷峻谷曰勿墜昉昕寤而仰思兮
心濛濛猶未察黃神邈而靡質兮儀遺識以臆對曰乘高
而還神兮道遐通而不迷葛緜緜於樛木兮詠南風以爲
緩蓋惴惴之臨深兮乃二雅之所祗旣訊爾以吉象兮又
申之以炯戒盍孟晉以迨羣兮辰儵忽其不再承靈訓其
虛徐兮佇盤桓而且俟惟天地之無窮兮鮮生民之晦在

紛屯遭與蹇連兮，同艱多而知寡。上聖迕而後拔兮，豈羣
黎之所禦。昔衛叔之御昆兮，昆爲寇而喪予。管彎弧欲斃
讐兮，讐作后而成己。變化故而相詭兮，孰云預其終始。雍
造怨而先賞兮，丁繇見韻補惠而被戮。栗取弔于迨吉兮，王

膺慶於所蹇。叛迴穴其若茲兮，北叟頗識其倚伏。單治裏
而外凋兮，張脩禊而內逼。聿中和爲庶幾兮，顏與冉又不

得溺。招路以從己兮，謂孔氏猶未可安。惛惛而不葩見韻補

兮，卒隕身乎世禍。遊聖門而靡救兮，雖覆醢其何補。固行
行其必凶兮，免盜亂爲賴。道形氣發于根柢兮，柯葉彙而

零茂恐魍魎之責影兮羌未得其云已黎淳耀于高辛兮
竿彊大於南汜嬴取威於伯儀兮姜本支乎三趾既仁得
其信然兮仰天路而同軌東鄰虐而殲仁兮王合位乎三
五戎女列而喪孝兮伯祖歸於龍虎發還師以成命兮重
醉行而自耦震鱗燦于夏庭兮匝三正而滅姬巽羽化于
宣宮兮彌五辟而成災道修長而世短兮夙冥默而不周
胥仍物而鬼諛兮乃窮宙而達幽媯巢姜於孺筮兮且算
祀于契龜宣曹興敗於下夢兮魯衛名隘見韻補於銘謠妣
聆呱而劾石兮許相理而鞠條道混成而自然兮術同原

而分流神先心以定命兮命隨行以消息幹流遷其不濟
分故遭罹而羸縮三變同于一體兮雖移易而不忒洞參
差其紛錯兮斯衆兆之所惑周賈盪而貢憤兮齊死生與
禍福抗爽言以矯情兮信畏犧而忌鵬所貴聖人之至論
兮順天性而斷詎物有欲而不居兮亦有惡而不避守孔
約而不貳兮乃輜德而無纍三人殊於一致兮夷惠外而
齊聳木偃息以蕃魏兮申重繭以存荆紀焚躬以衛上兮
皓頤志而弗傾俟草木之區別兮苟能實其必榮要沒世
而不朽兮乃先民之所程觀天網之絃覆兮實棊謀而相

訓謨先聖之大猷兮亦鄰德而助信虞韶美而儀鳳兮孔
忘味於千載素文信而底麟兮漢寶祚於異代精通靈而
感物兮神動氣而入微養流睇而猿號兮李虎發而石開
非精誠其焉通兮苟無實其孰信操末伎猶必然兮矧眈
躬於道眞登孔昊而上下兮緯羣龍之所經朝眞觀而夕
化兮猶誼己而遺形若胤彭而偕老兮訴來哲而通情亂
曰天造草昧立性命兮復心弘道惟聖賢兮渾元運物流
不處兮保身遺名民之表兮舍生取誼亦道用兮憂傷天
物忝莫痛兮皓爾太素曷淪色兮尙越其幾淪神域兮

選文

終南山賦

惜陰軒本古文苑云賦一作頌

伊彼終南巋巖嶙困槩青宮觸紫宸嶽峯鬱律萃于霞芬
曖 曖靄若鬼若神傍吐飛瀨上挺修林立泉落落密陰
沉沉榮期綺季此焉恬心三春之季孟夏之初天氣肅清
周覽八隅皇鸞鸞警乃前驅爾其珍怪碧玉挺其阿密
房溜其巔翔鳳哀鳴集其上清水泌流注其前彭祖宅以
蟬蛻安期饗以延年唯至德之爲美我皇應福以來臻掃
神壇以告誠薦珍馨以祈仙嗟茲介福永終億年

流澤遂而成水停積結而爲山

山文選游天台賦注引

固仙靈之所

遊集

頭
文
引
寺
碑

竹扇賦

青青之竹形兆直妙華長竿紛實翼杳篠叢生於水澤疾
風時紛紛蕭颯削爲扇製成器美託御君王供時有度量
異好有圓方來風辟暑致清涼安體定神達消息百王傳
之賴功力壽考康寧累萬億

古文苑

論史記秦始皇本紀贊語上秦過失表

史記正義曰班固典引云後漢明帝永平十七年
詔問班固太史遷贊語中寧有非耶班固上表陳

秦過失及賈誼言答之

右秦襄公至二世六百一十歲孝明皇帝十七年十月十五日乙丑周歷已移仁不代母秦直其位呂政殘虐然以諸侯十三並兼天下極情縱欲養育宗親三十七年兵無所不加制作政令施於後王蓋得聖人之威河神授圖據狼弧蹈參伐佐攻驅除距之稱始皇始皇既歿胡亥極愚驪山未畢復作阿房以遂前策云凡所爲貴有天下者肆意極欲大臣至欲罷先君所爲誅斯去疾任用趙高痛哉言乎人頭畜鳴不威不伐惡不篤不虛亡距之不得當殘

虐以促斯雖居形便之國猶不得存子嬰度次得嗣冠玉
冠冠佩華紱車黃屋從百司謁七廟小人乘非位莫不悅
忽失守偷安日日獨能長念却慮父子作權近取於戶牖
之間竟誅猾臣爲君討賊高死之後賓婚未得盡相勞餐
未及下咽酒未及濡脣楚兵已屠關中真人翔霸上素車
嬰組奉其符璽以歸帝者鄭伯茅旌鸞刀嚴王退舍河決
不可復壅魚爛以可復全賈誼司馬遷曰向使嬰有庸主
之才僅得中佐山東雖亂秦之地可全而有宗廟之祀未
當絕也秦之積衰天下士崩瓦解雖有周旦之材無所復

陳其巧而以責一日之孤誤哉俗傳秦始皇起罪惡胡亥
極得其理矣復責小子云秦地可全所謂不通時變者也
紀季以鄴春秋不名吾讀秦紀至於子嬰車裂趙高未嘗
不健其決憐其志嬰死生之義備矣

表

爲第五倫薦謝夷吾表

臣聞堯登稷契治隆太平舜用皋陶政致雍熙殷周雖有
高宗昌發之君猶賴傳說呂望之策故能克崇其業允協
大中竊見鉅鹿太守會稽謝夷吾出自東州厥土塗泥而

英資挺特奇偉秀出才兼四科行包九德仁足濟時知周
萬物加以少膺儒雅韜含六籍推考星度綜校圖錄探蹟
聖秘觀變歷徵占天知地與神合契據其道德以經王務
昔爲陪隸與臣從事奮忠義之操躬史魚之節董臣嚴網
勗臣懦弱得以免戾實賴厥勳及其應選作宰惠敷百里
降福彌異流化若神爰牧荊州威行邦國奉法作政有周
召之風居儉履約紹公儀之操尋功簡能爲外臺之表聽
聲察實爲九伯之冠遷守鉅鹿致合時雍德量績謀有伊
呂管晏之任闡弘道奧同史蘇京房之倫雖密勿在公而

聲出心隱不殉名以求譽不馳驚以要寵念存遜遁演志
箕山方之古賢實有倫序採之於今超然絕俗誠社稷之
元龜大漢之棟莖宜當拔擢使登鼎司上令三辰順軌於
歷象下使五品咸訓於嘉時必致休徵克昌之慶非徒循
法奉職而已臣以頑駑器非其疇尸祿負乘名惕若厲願
乞骸骨更授夷吾上以光七曜之明下以厭率土之望庶
令微臣塞咎免悔

奏記 牋 書

奏記東平王蒼

將軍以周召之德立乎本朝承休明之策建威靈之號昔
在周公今也將軍詩書所載未有三此者也傳曰必有非
常之人然後有非常之事有非常之事然後有非常之功
固幸得生於清明之世豫在視聽之末私以螻螳竊觀國
政誠美將軍擁千載之任躡先聖之蹤體弘懿之姿據高
明之執博貫庶事服膺六藝白黑簡心求善無厭採擇狂
夫之言不逆負薪之議竊見幕府新開廣延羣俊四方之
士顛倒衣裳將軍宜詳唐殷之舉察伊臯之薦令遠近無
偏幽隱必達期於總攬賢才收集明智爲國得人以寧本

朝則將軍養志和神優游廟堂光名宣於當世遺烈著於
無窮竊見故司空掾桓梁宿儒盛名冠德州里七十從心
行不踰知蓋清廟之光輝當世之俊彥也京兆祭酒晉馮
結髮修身白首無違好古樂道立默自守古人之美行時
俗所莫及扶風掾李育經明行著教育百人客居杜陵茅
室土階京兆扶風二郡更請徒以家貧數辭病去溫故知
新論議通明廉清脩潔行能純備雖前世名儒國家所器
韋平孔翟無以加焉宜令考績以參萬事京兆督郵郭基
孝行著於州里經學稱於師門政務之績有絕異之效如

得及明時秉事下僚進有羽翮奮翔之用退有杞梁一介
之死涼州從事王雍躬下嚴之節文之以術藝涼州冠蓋
未有宜先雍者也古者周公一舉則三方怨曰奚爲而後
己宜及府開以慰遠方弘農功曹史殷肅達學洽聞才能
絕倫誦詩三百奉使專對此六子者皆有殊行絕才德隆
當世如蒙徵納以輔高明此山梁之秋夫子所爲歎也昔
卞和獻寶以離斷趾靈均納忠終於沈身而和氏之璧千
載垂光屈子之篇萬世歸善願將軍隆照微之明信日昃
之聽少屈威神咨嗟下問令塵埃之中永無荆山汨羅之

恨張薄曰殷肅固集作段肅六子惟李育見後漢儒林傳

已作折趾沈身下一有善一作彌章

與竇憲牋 六首

今月中舍以令賜固把刀曰此大將軍少小時所服今賜

固伏念大恩且喜且慙書鈔類聚同

將軍哀憐賜以玉躬所喜駭犀玳瑁簪絛單衣以魯縞

之質被服鸞鳳之采飾書鈔引張本脫絛字

將軍哀憐賜固手迹告以中軍鮮明乃賜以珥玫瑰瑇瑁簪

絛絛單衣書鈔類聚引此無珥

二書鈔類聚引此無珥

固於張掖縣受賜虎頭繡鞞囊一雙又遺身所服鞞三具

錯鏤鐵一御覽引固集作寶憲前
身所服物虎頭云云

與竇固牋

將軍相憐固乃賜以玉躬所著駁瑋瑁簪書鈔御覽作復
與竇憲

賜犀毗金頭帶此將軍所自帶也御覽

與弟超書九首

傅武仲以能屬文為蘭臺令史下筆不能自休書鈔六
十二

得伯章徐幹字伯章扶風平陵人官至班
超軍司馬善章草固與超書稱之書藁勢殊工與

知識讀之莫不歎息實亦藝由己立名自人成御覽七
百四十九

寶侍中遺仲升作書 錢 百二十二 楚騰陵錯橫刀 賊皂削一

枚金錯半垂刀一枚楚騰陵標首 王珣劍一枚

寶侍中令載雜綵七百疋市月氏馬蘇合香

寶侍中前寄人錢八十萬市得雜罽十餘張也百 十 六 八

月支毳大小相雜但細好而已張 書 鈔 百 三 十 四

今齎白素三百疋欲以市月支馬蘇合香闐登百 十 四 八

今遺仲升虎頭金鑿囊金鈎御 覽 六 百 五 一 瑇瑁黑犀簪

各一枚書 鈔 百 二 十 七 字 御 覽 無 著 一 枚 三 字

符命

典引

序

臣固言永平十七年臣與賈逵傅毅杜矩展隆郗萌等召詣雲龍門小黃門趙宣持秦始皇帝本紀問臣等曰太史遷下贊語中寧有非邪臣對此贊賈誼過秦篇云向使子嬰有庸主之才僅得中佐秦之社稷未宜絕也此言非是卽召臣入問本聞此論非邪將見問意開寤耶臣具對素聞知狀詔因曰司馬遷著書成一家言揚名後世至以身陷刑之故反微文刺譏貶損當世非誼士也司馬相如淪行無節但有浮華之詞不周於用至於疾病而遺忠主上

求取其書竟得頌述功德言封禪事忠臣効也至是賢遷
遠矣臣固常伏刻誦聖諭昭明好惡不遺微細緣事斷誼
動有規矩雖仲尼之因史見意亦無以加臣固被學最舊
受恩浸深誠思畢力竭情昊天罔極臣固頓首頓首伏爲
相如封禪靡而不典揚雄美新典而亡實然皆游揚後世
垂爲舊式臣固才朽不及前人蓋詠雲門者難爲音觀隨
和者難爲珍不勝區區竊作典引一篇雖不足雍容明盛
萬分之一猶樂啟發憤懣覺悟童蒙光揚大漢軼聲前代
然後退入溝壑死而不朽臣固愚戇頓首頓首曰

太極之原兩儀始分烟烟熅熅有沈而奧有浮而清沈浮
交錯庶類混成肇命民主五德初起同于草昧玄混之中
踰繩越契寂寥而亡詔者系不得綴也厥有氏號紹天闡
繹者莫不開元於太昊皇初之首上哉復乎其書猶可得
而脩也亞斯之世通變神化函光而未曜若夫上稽乾則
降承龍翼而炳諸典謨以冠德卓絕者莫崇乎陶唐陶唐
舍胤而禪有虞亦命夏后稷契熙載越成湯武股肱既周
天迺歸功元首將授漢劉俾其承三季之荒末值亢龍之
災孽懸象闔而恒文乖彝倫斁而舊章缺故先命玄聖使

綴學立制宏量洪業表相祖宗贊揚迪哲備哉燦爛真神明之式也雖前聖臯夔衡且密勿之輔比茲編矣是以高光二聖宸居其域時至氣動乃龍見淵躍拊翼而未舉則威靈紛紜海內雲蒸雷動電燦胡縊莽分尙不泄其誅然後欽若上下恭輯羣后正位度宗有于德不台淵穆之讓靡號師矢敦奮撝之容蓋以膺當天之正統克受讓之歸運蓄炎上之烈精蘊孔佐之弘陳云爾洋洋乎若德帝者之上儀詰誓所不及已鋪觀二代洪纖之度其曠可探也竝開述於一贊同受侯甸之服奕世動民以方伯統牧乘

其命賜彤弧黃鉞之威用討韋顧黎崇之不恪至干參五
華夏京遷鎬亳遂自北面虎螭其師革滅天邑是故誼士
偉而不敦武稱未盡護有慙德不其然與亦猶於穆猗那
翁純皦繹以崇嚴祖考殷薦宗配帝發祥流慶對越天地
者烏奕乎千載豈不克自神明哉誕略有常審言行於篇
籍光藻郎而不渝耳矧夫赫赫聖漢巍巍唐基泝溯其源
乃先孕虞育夏甄殷陶周然後宣二祖之重光襲四宗之
緝熙神靈日燭光被六幽仁風翔乎海表威靈行乎鬼區
匿亡回而不泯微胡瑣而不頤故夫顯定三才昭登之績

匪堯不興鋪聞遺策在下之訓匪漢不弘厥道至於經緯
乾坤出入三光外連渾元內浸豪芒性類循理品物咸亨
其已久矣盛哉皇家帝世德臣列辟功君百王榮鏡宇宙
尊亡與亢乃始虔葦勞謙兢兢業業貶成抑定不敢論制
作至今遷正黜色賓監之事渙揚寓內而禮官儒林屯朋
篤誨之士不傳祖宗之髣髴雖云優慎無乃蕙與於是三
事岳牧之寮僉爾而進曰陛下仰監唐典中述祖則俯蹈
宗軌躬奉天經惇睦辨章之化治巡靖黎蒸懷保鰥寡之
惠浹燔瘞懸沈肅祇羣神之禮備是以來儀集羽族於觀

魏肉角馴毛宗於外囿擾緇文皓質於郊升黃輝采鱗於
沼甘露霄零於豐草三足軒翥於茂樹若乃嘉穀靈草奇
獸神禽應圖合謀窮祥極瑞者朝夕珣牧日月邦畿卓犖
乎方州洋溢乎要荒昔姬有素雉朱鳥玄柜黃犇之事耳
君臣動色左右相趨濟濟翼翼峩峩如也蓋用昭明資畏
承聿懷之福亦以寵靈文武貽燕後昆覆以懿鑠豈其爲
身而有顯辭也若然受之亦宜勤恁旅力以充厥道啟恭
館之金滕御東序之秘寶以流其占夫圖書亮章天哲也
孔繇先命聖孚也體行德本正性也逢吉丁辰景命也順

命以創制因定以和神答三靈之蕃祉展放唐之明文茲
事體大而允牖寐次於聖心瞻前顧後豈蔑清廟憚勅天
命也伊考自遂古乃降戾爰茲作者七十有四人有不俾
而假素罔光度而遺章今其如台而獨闕也是時聖上固
以垂精遊神苞舉藝文屢訪羣儒俞咨故老與之斟酌道
德之淵源餉敷仁義之林藪以望元符之臻焉既感羣后
之讜辭又悉經五絲之碩慮矣將緝萬嗣揚洪輝奮景炎
扇遺風播芳烈久而逾新用而不竭汪汪乎丕天之六律
其疇能巨之哉唐哉皇哉皇哉唐哉

頌

竇車騎北征頌

車騎將軍應昭明之上德該文武之妙姿蹈左歷握輔揅

翼肱聖上作主光輝資天心謨神明規卓遠圖幽冥親率

戎士巡撫疆城

一作城

勒邊御之永設奮轡

古文苑當作轡

櫓之

遠徑閔遐黎之騷狄念荒服之不庭乃總三選簡虎校勒

部隊明誓號援謀夫於末言察武毅於俎豆取可杖於品

象拔所用於仄陋料資器使采用先務民儀響慕羣英影

附羗戎相率東胡爭驚不召而集未令而諭於是雷震九

原電曜高闕金光鏡野武旗冒日衝雞鹿超黃磧輕選四
縱所從莫敵馳颯疾踵蹊迹探梗莽探嶮斷溫禺分尸
逐電激私渠星流霰落名王交手稽顙請服乃收其鋒鏃
千鹵甲冑積象如邱阜陳閱滿廣野戢載連百兩散數屢
萬億放獲驅孳揣城拔邑擒馘之倡九谷謠諫古文響聒
東夷埃塵戎域然而唱呼鬱憤未逞厥願甘平原之酣戰
矜訊捷之累算何則上將崇至仁行凱易弘濃恩降溫澤
同庖厨之珍饌分裂室之織帛勞不御輿寒不施釋行無
偏勤止無兼役慳蒙識而復戾順貳者異而懦夫奮遂踰

涿郡跨祈連籍庭蹈就疆獯靖嶼嶠幽山趨凶河臨安候
軼馬居與虞衍顧衛霍之遺迹賅伊秩之所邀師橫驚而
庶御士佛懼以爭先回萬里而風騰劉殘寇於沂垠糧不
賦而師瞻役不重而備軍行戎醜以禮教圻鴻校而昭仁
文武炳其竝隆威德兼而兩信清乾鈞之攸冒拓畿略之
所順橐弓鏃而戢戈回雙麾以東運於是封燕然以隆高
禮廣鞬以弘曠銘靈陶以勒崇欽皇祇之祐貺宣惠氣盪
殘風軻秦幽嘉凝陰飛雪灑庶其雨洒淋榛枯一握興

古

苑注此
有股誤

嘉卉始濃土膏含養四行分任於是三軍稱曰豐

疊將軍克廣德心光光神武弘昭德音超兮首天潛眇兮

與神參 古文苑

東巡頌

竊見巡狩岱宗柴望山虞崇祀明堂上稽帝堯中述世宗
遵奉世祖禮義備具動自聖心是以神明屢應休徵乃降
事大而瑞盛誠非一小臣所任頌述不勝狂簡之情謹上

岱宗頌一篇

御覽五百三十七引有
事大以下十七字

曰若稽古在漢迪哲聿脩厥德憲章不烈翻六龍較五輅
齊百僚陶質素命南重以司歷厥中月之六辰備天官之

列衛盛輿服而東巡

古文苑
後闕

乘輿動色羣后屏氣萬騎齊鑣千乘弭轡

御覽三百五
九引東巡頌

南巡頌

惟漢再受命系葉十一協景和則天經郊高宗光六幽通
神明既禘祖於西都又將袷于南庭是時聖上運天官之
法駕建日月之旃旌

古文苑

銘

封燕然山銘

有序

維永元元年秋七月有漢元舅日車騎將軍竇憲夤亮聖

皇登翼王室納于大麓惟清緝熙乃與執金吾耿秉述職
巡禦治兵於朔方鷹揚之校螭虎之士爰該六師暨南單
于東胡烏桓西戎氏羌侯王君長之羣驍騎十萬元戎輕
武長轂四分雷輜敵路萬有三千餘乘勒以八陣泄以威
神玄甲耀日朱旗絳天遂凌高闕下雞鹿經磧鹵絕大漠
斬溫禺以釁鼓血尸逐以淬鏢然後四校橫徂星流彗掃
蕭條萬里野無遺寇於是域滅區殫反旆西旋考傳驗圖
窮覽其山川遂踰涿邪跨安侯乘燕然躡冒頓之區落焚
老上之龍庭將上以據高文之宿憤光祖宗之玄靈下以

安固後嗣恢拓境宇振大漢之天聲茲可謂一勞而九逸
暫費而永寧也乃遂封山刊石昭銘盛德其辭曰

鑠王師兮征荒裔勦凶虐兮截海外復其邈兮亘地界封

神邱兮建隆峒其例反與禍同熙帝載兮振萬世

高祖泗水亭長碑銘古班文苑章樵注固文見同集

案司馬貞史記高祖本紀索隱云貞打得班固泗

水亭古碑文其字分明有母溫氏云云則此銘標

題亭下當遺長字而銘中無母溫氏三字是此銘

仍有缺文又文有敘將十八贊述股肱等句集中

十八侯銘前係碑後附銘古文苑誤分二篇張溥
因之非也姑仍之

皇皇聖漢兆自沛豐乾降著符精感赤龍承魁流裔襲唐

末風寸天

引補十陽
作木

尺土無俟

補廢

斯亭建號宣基維以

沛公揚威斬蛇金精摧傷涉關陵郊係獲秦王應門造勢

斗璧納忠天期乘祚受爵漢中勤陳東征剗擒三秦靈威

神祐鴻溝是乘漢軍改歌楚衆易心誅項討羽諸夏以康

陳張畫策蕭勃翼終出爵褒賢裂土封功炎火之德彌光

以明源清流潔本盛末榮叙將十八贊述股肱休助顯祚

永永無疆國寧家安我君是升根生葉茂舊邑是仍於皇
舊亭苗嗣是承天之福祐萬年是興

十八侯銘

鄼侯蕭何第一

兢兢相國弘策不追御國維綱秉統樞機文昌四友漢有
蕭何序功第一受封於鄼

將軍舞陽侯樊噲第二

歔歔將軍威蓋不當操盾千鈞拔主項堂興漢破楚矯矯
忠良卒爲丞相帝室以康

將軍留侯張良第三

赫赫將軍受兵黃石規圖勝負不出帷幄令惠瞻仰安全
正朔國師是封光榮舊宅

太尉絳侯周勃第四

懿懿太尉醇厚樸誠輔翼受命應節御營歷位卿相土國
兼并見危致命社稷以寧

將軍平陽侯曹參第五

蹇蹇相國允忠克誠臨危處險安而匡傾興代之際濟主
立名身履國土秉御乾楨

丞相戶牖侯陳平第六

洋洋丞相勢譎師旅擾攘楚魏為漢謀主六奇解厄揚名
於後

南宮侯張敖第七

堂堂張敖耳之遺萌以誠佐國序跡建忠功成德立襲封

南宮垂號萬春

韻補十陽
注引作壽永保無疆

衛尉曲陽侯酈商第八

衍衍衛尉德行循規遭兄食其隕歿於齊橫恥愧景刎頸
白獻金紫褒表萬世不刊

將軍潁陽侯灌嬰第九

煌煌將軍輔漢久長威振呂氏姦惡不揚寇攘殄盡躬迎
代王功顯帝室萬世益章

將軍汝陰侯夏嬰第十

斌斌將軍鷹武是揚內康王室外鎮四方諸夏乂安流及
要荒聲騁海內苗嗣紀功

將軍陽陵侯傅寬第十一

休休將軍如虎如熊御師勒陳破敵以威靈金隴楚火流
鳥飛將命杖節功績永垂

將軍信武侯靳歙第十二

斤斤將軍忠信孔雅出身六帥十二四旅折衝扞難遂寧
天下金龜章德建號傳後

丞相安國侯王陵第十三

明明丞相天賦庭直剛德正行不枉不曲功業成著榮顯
食邑距呂奉主昭然不惑

將軍襄平侯韓信第十四

桓桓將軍輔主克征奉使全璧身泐

古文苑
一作涉

項營序功差

德履讓以平轉北而遊雲中以傾

將軍棘津侯陳武第十五

巖巖將軍帶武佩威御雄乘險難困不違仇滅主定四海
是植功成食土德被遐邇

曲成侯蠱逢第十六

晏晏曲成輿從龍騰安危從主赤曜以升赫赫皇皇道彌
光明惟德御國流及後萌

御史大夫汾陰侯周昌第十七

肅肅御史以武以文相趙距呂志安居身徵詣行所如意
不全天秩邑土勛乃永存

將軍青陽侯王吸第十八

邑邑將軍育養烝徒建謀正直行不匿邪入軍討敵頂定
天都佩雀雙印百里爲家

古文苑

議

匈奴和親議

竊自惟思漢興已來曠世歷年兵纏夷狄尤事匈奴綏御
之方其塗不一或脩文以和之或用武以征之或卑下以
就之或臣服而致之雖屈申無常所因時異然未有拒絕
棄放不與交接者也故自建武之世復修舊典數出重使

前後相繼至於其末始乃暫絕永平八年復議通之而廷
爭連日異同紛回多執其難少言其易先帝聖德遠覽瞻
前顧後遂復出使事同前世以此而推未有一世闕而不
脩者也今烏桓就闕稽首譯官康居月氏自遠而至匈奴
離析名王來降三方歸服不以兵威此誠國家通於神明
自然之徵也臣愚以爲宜依故事復遣使者上可繼五鳳
甘露致遠人之會下不失建武永平羈縻之義虜使再來
然後一往旣明中國主在忠信且知聖朝禮義有常豈可
逆詐示猜孤其善意乎絕之未知其利通之不聞其害設

後北虜稍彊能爲風塵方復求爲交通將何所及不若因
今施惠爲策近長

序

離騷序

昔在孝武博覽古文淮南王安敘離騷傳以國風好色而
不淫小雅怨誹而不亂若離騷者可謂兼之蟬蛻濁穢之
中浮游塵埃之外嚼然泥而不滓推此志雖與日月爭光
可也斯論似過其真又說五子以失家巷謂伍子胥也及
至羿澆少康貳姚有娥佚女皆各以所識有所增損然猶

未得其正也故博采經書傳記本文以爲之解且君子道
窮命矣故潛龍不見是而無悶關雎哀周道而不傷蘧瑗
持可懷之智甯武保如愚之性咸以全命避害不受世患
故大雅曰既明且哲以保其身斯爲貴矣今若屈原露才
揚己競乎危國羣小之閒以離讒賊然貢數懷王怨惡椒
蘭愁神苦思強非其人忿懟不容沈江而死亦貶絜狂狷
景行之士多稱崑崙帝閭宓妃虛無之語

文選贈白馬王
彪詩注引作帝王

關及古本
作冥婚悞本

皆非法度之政經義所載謂之兼詩風雅而與
日月爭光過矣然其文弘博麗雅爲辭賦宗後世莫不斟

酌其英華則象其從容自宋玉唐勒景差之徒漢興枚乘
司馬相如劉向揚雄騁極文辭好而悲之自謂不能及也
雖非明智之器可謂妙才者也

王逸楚辭注

離騷贊序

離騷者屈原之所作也屈原初事懷王甚見信任同列上官大夫妒害其寵譏之王王怒而疎屈原屈原以忠信見疑憂愁幽思而作離騷離猶遭也騷憂也明己遭憂作辭也是時周室已滅七國並爭屈原痛君不明信用羣小國將危亡忠誠之情懷不能已故作離騷上陳堯舜禹湯文

王之法下言羿澆桀紂之失以風懷王終不覺寤信反閒
之說西朝於秦秦人拘之客死不還至於襄王復用讒言
逐屈原在野又作九章賦以風諫卒不見納不忍濁世自
投汨羅原死之後秦果滅楚其辭爲衆賢所悼悲故傳於

後

同上

連珠

擬連珠

五首

臣聞公輸愛其斧故能妙其功明主貴其士故能成其治
臣聞良匠度其材而成大厦明主器其士而建功業

臣聞聽決價而資玉者無楚和之名因近習而取士者無
伯王之功故璵璠之爲寶非駟僮之術伊呂之爲佐非左
右之舊

臣聞鸞鳳養六翮以凌雲帝王乘英雄以濟民易曰鴻漸
于陸其羽可用爲儀

臣聞馬伏皂而不用則駑與良而爲羣士齊寮而不職則
賢與愚而不分

詩

郊祀靈芝歌

因露寢兮產靈芝象三德兮瑞應圖延壽命兮光此都配
上帝兮象太微參日月兮揚光輝

詠史

三王德彌薄惟後用肉刑太倉令有罪就逮長安城自恨
身無子困急獨熒熒小女痛父言死者不可生上書詣闕
下思古歌雞鳴憂心摧折裂晨風揚激聲聖漢孝文帝惻
然感至情百男何憤憤不如一緹榮

竹扇詩

供時有度量異好有團方來風堪避暑靜夜致清涼

雜文

奕旨

大冠言博既終或進而問之曰孔子稱有博奕今博行於世而奕獨絕博義既弘奕義不述問之論家帥不能說其聲可聞乎曰學不廣博無以應客北方之人謂碁爲奕弘而說之舉其大略厥義深矣局必方正象地則也道必正直神明德也碁有白黑陰陽分也駢羅列布效天文也四象既陳行之在人蓋王政也成敗藏否爲仁由己道之正也夫博懸於投不專在行優者有不遇劣者有僥倖踰拿

相凌氣勢力爭雖有雄雌未足以爲平也至於奕則不然
高下相推人有等級若孔氏之門回賜相服循名責實謀
以計策若唐虞之朝考功黜陟器用有常施設無析

古文
一

所作

因敵爲資應時屈伸續之不復變化日新或虛設豫置

以自護衛蓋象庖義罔苦之制隄防周起障塞漏決有似
夏后治水之勢一孔有闕壞頽不振有似瓠子汎濫之敗
一碁破室亡地復還曹子之威作伏設詐突圍橫行田單
之奇要厄相劫割地取償蘇張之姿固本自廣敵人恐懼
三分有二釋而不誅周文之德知者之慮也既有過失能

量弱強遠巡儒行保角佞旁却自補續雖敗不亡繆公之
智中庸之方也上有天地之象次有帝王之治中有五霸
之權下有戰國之士覽其得失古今略備及其晏也至於
發憤妄食樂以妄憂推而高之仲尼概也樂而不淫哀而
不傷質之詩書關雎類也紕專知柔陰陽代至施之養性
彭祖氣也外若無爲默而識淨泊自守以謂補西真道意
隱居放言遠咎悔行象虞仲信可喜感乎大冠論未備故
因問者喻其事古文苑

答寶戲

有序

永平中爲郎興校秘書專篤志於儒學以著述爲業或譏以無功有感東方朔揚雄自喻以不遭蘇張范蔡之時曾不折之以正道明君子之所守故聊復應焉其辭曰

賓戲主人曰蓋聞聖人有一定之論烈士有不易之分亦云名而已矣故太上有立德其次有立功夫德不得後身而特盛功不得背時而獨彰是以聖哲之治棲棲遑遑孔席不暎墨突不黔由此言之取舍者昔人之上務著作者前烈之餘事耳今吾子幸游帝王之世躬帶紱冕之服浮英華湛道德贊龍虎之文舊矣卒不能據首尾奮翼鱗振

援滂塗跨騰風雲使見之者影駭聞之者響震徒樂枕經
籍書紆體衡門上無所帶下無所根獨據意乎宇宙之外
銳思於毫芒之內潛神默記繼以年歲然而器不賈於當
已用不效於一世雖馳辯如濤波擗藻如春華猶無益於
殿最也意者且運朝夕之策定合會之計使存有顯號亡
有美諡不亦優乎主人迫爾而笑曰若賓之言所謂見世
利之華闢道德之實守窆輿之熒燭未仰天庭而覩白日
也曩者王塗蕪穢周失其馭侯伯方軌戰國橫鶩於是七
雄虓鬪分裂諸夏龍戰虎爭游說之徒風颺雷激並起而

救之其餘森飛景附霄煜其間者蓋不可勝載當此之時
擲朽摩鈍鈇刀皆能一斷是故魯連飛一矢而蹶千金虞
卿以顧盼而捐相印夫啾發投曲感耳之聲合之律度盡
而不可聽者非韶夏之樂也因勢合變遇時之容風移俗
易乖迂而不可通者非君子之法也及至從人合之衡人
散之亡命漂說羈旅聘辭商鞅挾三術以鑽孝公李斯奮
時務而要始皇彼皆躡風塵之會履顛沛之勢據微乘邪
以求一日之富貴朝爲榮華夕爲顛頓福不盈眚禍溢於
世凶人且以是會

滋補四真
作自悔

况吉士而是賴乎功不可以

虛成名不可以僞立韓設辯以激君呂行詐以賈國說難
既適其身乃囚秦貨既貴厥宗亦墜是以仲尼抗浮雲之
志孟軻養浩然之氣彼豈樂爲迂濶哉道不可以貳也方
今大漢西掃羣穢夷險芟荒廓帝紘恢皇綱基隆於義農
規廣於黃唐其君天下也炎之如日威之如神函之如海
養之如春是以六合之內莫不同源共流沐浴立德稟仰
太和枝附葉著譬如草木之植山林鳥魚之毓川澤得氣
者蕃滋失時者零落參天地而施化豈云人事之厚薄哉
今吾子處皇代而論戰國矐所聞而疑所覲欲從教士敦而

度高乎泰山懷汎濫而測深乎重淵亦未至也賓曰若夫
鞅斯之倫衰周之凶人既命聞矣敢問上古之士處身行
道輔世成名可述於後者默而已乎主人曰何爲其然也
昔者咎繇請虞箕子訪周言通帝王謀合神聖殷說夢發
於傅巖周望兆動於謂濱齊甯激聲於康衢漢良受書於
邳垠皆俟命而神交匪詞言之所信故能建必然之策展
無窮之勳也近者陸子優游新語以興董生下帷發藻儒
林劉向司籍辯章舊聞揚雄譚思法言太玄皆及時君之
門闡究先聖之靈奧婆娑乎術藝之場休息乎篇籍之囿

以全其質而發其文用納乎聖德烈炳乎後人斯非其亞
歟若乃伯夷抗行於首陽柳惠降志而辱仕顏潛樂於簞
瓢孔終篇於西狩聲盈塞於天淵真吾徒之師表也且吾
聞之一陰一陽天地之方乃文乃質王道之綱有同有異
聖哲之常故曰慎修所志守爾天符委命供已味道之腴
神之聽之名其舍諸賓又不聞和氏之璧韞於荆石隋侯
之珠藏於蚌蛤乎歷世莫眊不知其將含景曜吐英精曠
千載而流光也應龍潛於潢汗魚鼈媮之不覩其能應靈
德合風雲超忽荒而躐昊蒼也故夫泥蟠而天飛者奮龍

之神也先賤而後貴者和隋之珍也時暗而久章者君子
之真也若乃牙曠清耳於管絃離婁眇目於毫分逢蒙絕
技於弧矢般輸推巧於斧斤良樂軼能於相馭烏獲抗力
於千鈞和鵠發精而鍼石研桑心計於無垠走亦不任廁
技於彼列故密爾自娛於斯文

雞嚴周

太古之世不車不舟陸足以游不棟不宇巢穴而處
衆人之逐世利如青蠅之赴肉汁也青蠅嗜肉汁而忘溺
死衆人貪世利而陷罪穢

案嚴周卽莊周漢世諱莊故或作嚴張本以第二則標
難莊論其實一題也今入此又太古字張本誤太史不
棟誤不棟今改正

珠
日
遊
書

佚文

目錄

馮商長安人成帝時以能屬書待詔金馬門受詔續太史

公書十餘篇

漢書張湯傳注如淳引班固目錄

白綺扇賦

初學記二十五引班固集有白綺扇賦

耿恭守疏勒城賦

日兮月兮阨重圍

文選關中詩注引

涿邪山祝文

仗節擁旄鉦人伐鼓

文選霍將軍后北伐詩注又宣德皇

功德論

今朝廷昭明空使朱軒之使鳳舉於龍堆之表

引書鈔四連

珠注無今明以下
七字原書鈔作風

馬仲都哀辭

并序

車騎將軍順文侯馬仲都明帝舅也從車駕於洛水浮橋
馬驚入水溺死帝顧謂侍御史曰班固在馬上三十步遂

為哀辭

張溥曰北堂書鈔載班固馬仲都哀辭按此文不似固
自序似人為序其事也

叔持誄

明帝時叔持白日於都市手劍父仇視死如歸史臣班固

爲之誄

隴州志

詩

寶劍值千金指之于樹枝

書鈔百二十
今附此

班蘭亭集終

癸亥六月陝西文獻徵輯處校印

岐山段維岡北校

每册銀角